Universal Declaration of Human Rights - Mende

© 1996 - 2009 The Office of the High Commissioner for Human Rights

This HTML version prepared by the *UDHR in Unicode* project, http://www.unicode.org/udhr.

Dunya Lahi Nuvuu Lonyisia Va

Magona Υερεί

A jifa kiliyei na kε numu vuu kpεlεε ti maa hεwulei lɔ towa kpaupau le laha va, tɔnya kεε ndilεli dunyihu.

A jifa ngawulεεhu kεε baagbuala nuvugaa ti lɔnyisia ma ti wanga a pie hindangaa na hii i wotεa a nεmahugili waa nuvuu ma, dunya ninahu mia mahoingɔ muvuu i gu i yερε kia ngi longɔla, kεε ngi lanayei kεε ngi lima hinda.

A jifa maa ii houni nu mu vuu i wote a kɔ gɔmɔ mahaya nyamu nyamu kεε nduwɔ ya yeya, kɛ mahoingɔε sawei i nuvuu lɔnyii mavale,

A jifa mahoingo ndiamoyei na ndolesialuahu i lɛgulɔma,

A jifa nungei nasia ti ndolei kpɛlɛ ti woyilɛi na hu ti lanaya gɛnga kɔlɔ yayilingɔihu,

Kεε nuvuu lonya, ngi nuvuu ya, ngi yeyei kεε hindui taa nyahii ti lonyei maahewu lei, kεε gboma ti ti lia yilinga ko yange yange kεε ndevu yekpe la i le guloma.

A jifa ndolei nasia ti dunyi hu ti lahei wumbua a ngoyila koo ti to kε baago ma a yεlo na nuvuu va kεε ngi lonya ya va,

A jifa kiliyei yaa numu kpɛlɛhu hinda yayilingɔi ji a lɛlɔ gulɔma,

Fale naa

Komεwai na ta toli a

Genela Asembili

Ndεnga Υε

Dunya Lahei ji nuvuu lonyinsia va i wote a ŋaiki numui kpɛlɛɛ kɛɛ ndɔlei kpɛlɛɛ va nahii kɛ numu gbi oo ngoyila hugbatɛ gbi na hinda yayilingoi ji ngi ɛnmahu kpɔtu i lapi kpugu kpugu a numu gaalahu wie i to kɛ bagooma iyɛ tonɛi jisia ma kɛɛ hugbɛmboi jisia nungei nasia wɛti yei ndoo kpɛlɛ hugbatai ji hu, kɛɛ nasia ti ndolongaa hu nahi tii yee ndolo kpɛlɛ hugbatɛi jisia bu.

1. Ngayilii Ye Ngilei

Numuvuisia Kpεlεε ta ti le tε yε nduwo ya hu, tao ti nuvuu yei kεε ti lonyi maa hεwungo. Kiiya kεε hindaluahu goola a yεlo ti hun. Fale mahoungo ti ti nyonyohu hoi kia ndeegaa.

2. Ngayilii Ye Fele Yei

Hugbatei ji numu kpεlεε lɔ va, nu gɛnyεi, ngi luwu yɛgii, nyaha ɔɔ hindgo, nu layia, Ngewɔi na a feli, ngi gilii yei, ngi le gi kεε ngi gbatε ii ma. Tao maa ii houni nduahu gε i waa nungaa luahu jifa tii gbuani ndɔlɔ yilahu, ɔɔ jifa tia heini ti yekpe va ɔɔ tii yekpe va.

3. Ngayilii Ye Sawa Yei

Nuvuu gbi ngi lonya mia koo ndevu i yε ngi hu, koo aa yε nuu bu, tao koo mahungbee i yε ngi ma.

4. Ngayilii Ye Naani Yei

Maa ii houni ti numu gbi hou nduwoya hu, οο ti ngi waa monεmonε hinda hu, maa ii houni nuu maajia va nduwoya hu, tao gboma mahoungo nduwoyei ye kεyi kgbi lekee i gboyo.

5. Ngayilii Ye Loolu Yei

Maa ii houni kɔɔ ti kpaagba hinda la nuu gbi ma, tao kɔɔ ti hinda wee a numu na a kε kε nuvuu yaa a ngie.

6. Ngayilii Ye Weita Yei

Nuvuu qbi lee ngi lonya mia koo sawei i baagoo ngi nuvuu ya ma mia leke qbi.

7. Ngayilii Ye Wofila Yei

Nuvuu kpεlεε ti maahεwungɔε sawei gulɔ, tao mahoungɔ sawei i ti mahu wεε nahi gbi εε ti hu wɔyɔ. Mahoungɔ sawei i tɔ kε hugbatei ji εε numugbi gbukpuu.

8 Ngayilii Ye Wayakpei

Nuu gbi ngi lonya mia koo sawa kpaambu ngaa yekpe ti ngi lonyɛi mavale a watii na ngi lonyi nasia ndoo jawei keni numu a nyani ngi ma.

9. Ngayilii Ye Taalui

Maa ii houni ti numu magba, ti ngi wu kpɛgbɛma ɔɔ ti ngi gbɛ ngi yee a baama hu we.

10. Ngayilii Ye Puui

Nuu gbi ngi lonya mia nahii ti la nyongaa ngi ma tɛ i ngi maahinda gulanga kolɛhu ɔɔ i sawa kpoukpou nyaninga, koɔ ti ye njie na le fofohu, tao koɔ sawakpambu jein jein gongaa ti loo ngi va.

11. Ngayilii Ye Puu Mahuyelei

- 1. Nuu gbi ngi lonya mia nahi ti la nyongaa ngi ma hinda ngamu va, taa kiti lewe haani ti ye njie na le fofohu, tao ti jia a sawe panda pandaa.
- 2. Maa ii houni ti baa nuu gbi ma a sawahu wee ndɔɔ yila jawa yo ɔɔ ndunya kpεlεε jawa. Tao gbɔma maa i houni sawei i kpagbaa la nuu ma na kaahu lewengɔ sawei na ma i nyanini.

12. Ngayilii Ye Puu Mahufilei

Maa ii houni nuu i yε na nahi ta loko wili ngi bundu hinda hu, ngi ye pεεbu hinda, kɔlei kɛɛ ngowili na a pili ngitiwoma kia lee ti longɔla, kɛɛ kakpama a baagbuama hu we. Maa houngɔ sawei i nuu gbi maawεε yεε kakpamεi ji bondayeya.

- 13. Ngayilii Ye Puumahu Sawei
- 1. Mahoungo numu gbi i yε hugbεmbo hu koo i li mia leke gbi ngi longo i li na, tao koo i hei ndoo gbi leke hu ngi longo i heihu.
- 2. Nuu gbi ngi lonya mia koo i gbua ndolo yila hu i li peka hu, i wee a ngi yee oo mbaa tinda, tao koo i yama ngi ndei na hu mia i gbuanina.
- 14. Ngayilii Ye Puumahu Naanii
- 1. Nuu gbi lonya mia koo i ngi yaama lowu kakpama yeye ndoo yεka hu, tao koo i nganei gbuana.
- 2. Ye sawei ji εε lεkpε gbi naleke ye numui ji i ndɔlɔ jawa nyanini, tao i hinda gbulaninga na ndɔlɔ woyila hugbatεi i loila.
- 15. Ngayilii Ye Puumahu Looli
- 1. Nuu gbi lənya mia kəə i wote a ndələlii.
- 2. Maa i houni koo ti nuu gbi baa a ngi lolii ya, oo koo ti ngi baa a ndololii ya ndoo yekahu.
- 16. Ngayilii Ye Puumahu Weitei
- Hindui taa nyahii na ti lakpango ta soowelo ti ndengaa le, ti gɛnyɛ ii yɛni bɛɛ yila, tii yɛni bɛɛ a ndolo yila hunblaa, οο Ngewo veli gbambi yila ma. Ti lonye maahɛwungo soova, soohu, οο ji ta lo ti golɛ.
- 2. Koo hindui taa nyaha ti soowεε, a nεε pεin ti veinja wε.
- 3. Bondei mia ndɔlei yei kpɔkui le, fale maahoungɔ heimii kε ndɔlɔ gbi ti bondei mahu gbεε kpɔtu kpɔtu.
- 17. Ngayilii Ye Puumahu Woilei
- 1. Nuu gbi lonya mia koo i ngi wuma haakangaa majoo, tao gboma koo taa nungaa ti makpoma haaka majoo.
- 2. Τε nuu gbi haaka gbua ngi yeya kia leke ti longɔla.
- 18. Ngayilii Ye Puumahu Waykpei

Nuu gbi loya mia koo i kiiya wee, koo i giila gboo tonyɛi le oo gboo i lonyani, Ngewoɛ ye gboo ngi longo i feli, ye tonye ji a ngi jein jein lo koo i ngi giliyei oo ngi yewoveilei wote, I wote bɛɛ atayakpe oo taa nungaa, fofohu oo sokuma, koo i nungaa gaa a ngi ngliyei kɛɛ ngi yewo hindei.

19. Ngayilii Ye Puumahu Taalui

Nuu gbi lɔnya mia kɔɔ i kiliya wee tao kɔɔ i yee kiiyeina le fofohu, yee tɔnyεi ji a peelɔ yee kiiyei ji nuu gbi εε gbekpa kulɔ, tao kɔɔ i nemahulee kεε ngowii majɔɔ tao kɔɔ ta bεε i fe nungaa wε a pele gbi hu we, nahi bandowoma gbi εε waa nduahu.

20. Ngayilii Ye Nugboyongoi

- 1. Nuu gbi lɔnya mia kɔɔ taa nungaa ti gomε, tao kɔɔ taa teini ti lee, i na lee hinda huwu va ii le.
- 2. Τεε nguaa numu gbi la a kpɔli hale kɔɔ i wote a komε ma mɔ.
- 21. Ngayilii Ye Nugboyongo-Mahuyelei
- 1. Nuu gbi lɔnya mia kɔɔ ngi loko i yε ngi guamɛti hindeihu, kε bεε ta vulii i yεhu ɔɔ nungaa tia vulii ta lokoloo ti ma.
- 2. Nuu gbi lɔnya mia kɔɔ ngi lɔɔhu guamɛti hugbatε wie ngoisia ti hiti ngi ma kia lee ta hiti nungaa ye pekeisia ma.
- 3. Nungaa mia maahoungo ti ti guamɛti hei, ti gbayei mia a pie a yenge, hulɛmbinga ta yamalo ti kɔlei gula, tao ye kɔlei ji a kgula bunduhulo, nahii nungbi ɛɛ gbekpa numu gulo.
- 22. Ngayilii Ye Nugboyongo-Mahufelei

Numu gbi lee ndɔlɔlii a ngie, ngi lɔlei kpɔma hugbatɛ wie ngi va, tao kɔɔ ngi lɔlei taa ngitiwoma hugbatɛ ti pee ye kpɔma hugbatei na i foo ngi ma, tao a majɔɔlɔ kialeke ngi lɔlei gbatɛi kɛɛ ye saweisia ti na, gbɔma kia lekee ye numui bɛɛ ngi hami gii na, kɔɔ wei i lɛgulɔ.

- 23. Ngayilii Ye Nugboyongo-Mahusawei
- 1. Numu gbi lɔnya mia kɔɔ i yenge, tao kɔɔ i ngengei na wie ngi longɔla, kɔɔ i mbεlɛhei majɔɔ ngengemεi, tao kɔɔ ti tɔ kɛngengei εε ngi lo.
- Numu gbi lonya mia, nahii nduahu gbiima, koo ti ngi pawa kia a yenge la.
- 3. Ngenge mɔgbi lɔnya mia kɔɔ ti ngi pawa nahii ta kεε ngi mablaa ta ti magbee gbualɔ hu kia nuvu, tao gbɔma kɔɔ kpɔma yeka i yena ngi va.
- 4. Ngenge mogbi lonya mia koo i wili hugbatshu na ngenga blaa ma vale.
- 24. Ngayilii Ye Nugboyongo-Mahunaani

Ngenge mɔgbi lɔnya mia kɔɔ i lɛvu tao kɔɔ i kpele yeka gbua, tao gbɔma kɔɔ aa ngenge huguangɔ waa wie, mahoungɔ gbɔma i yaa a ndɛvu wati majɔɔ, nahi i yaa ye ndevui na wie ma ta yaalɔ a ngi pawa.

- 25. Ngayilii Ye Nugboyono-Mahuloolui
- 1. Numu gbi lonya mia koo ta kee ngi mablaa ti ye kaahugbua hu, ti mehee yekpe me, ti kula yekpe yili, ti la ndama yekpe, ti hale yekpe majoo, tao gboma guameti i ye na ti va, hugbate yekpe i yena ngi va a watii na ee ye ngege hu, a watii na ngi heigengo, watii na ngi wovang, kee watii na hinda a wa ngi mahu nahii ee gumbu.
- 2. Mahoungo gboma hugbat ϵ i y ϵ na kuim ϵ isia k ϵ ϵ ndengaa va. Mahoungo ndengaa kp ϵ l ϵ ϵ , naa ti k ϵ taa ti njeni ti soohu oo tii soohu, ye hugbatei ji i ti maa w ϵ ϵ .
- 26. Ngayilii Ye Nugboyongo-Mahuweitei
- 1. Numu gbi lɔnya mia kɔɔ i kɔlɔ gaa. Maa ii houni navoo hinda i yε kɔlɔgaala ma, kε bεε i wote a ye tɔtɔmεi. Mahoungɔ kɔlɔ gaalei i wote a sawa kpawu kpawu na ndo gbi ε gbuama ye

totoomi. Nyandengo koo ngenge kolongaa i yna kpoto, kεε kolo yalngo gaalei naa va ti nεmabu lewengo.

- 2. Kɔlɔ gaalei i wote a hinda na a nuu lɛ gulɔma, ngi lɔnyisia kɛɛ ngi hugbɛmboi. I loko hei hinda yawubu gɔɔla, hinda bu houla kɛɛ ndiamɔya dunyei kpɛlɛɛ luahu, kɛnyɛisia kɛɛ Ngewɔ vɛli gbambisia luahu, tao kpaya waalɔ ndɔlɔ kpɛlɛ woyila yenge lukuisia hu kɔɔ ndilɛli i li gulɔma.
- 3. Bondeisia ti wote a haala bla ta kɛ na kaa ye gbɔɔ ti leingaa ta pee.
- 27. Ngayilii Ye Nugboyongo Mahuwofilei
- 1. Numu gbi lɔnya mia kɔɔ ngi loko i ye mia a yɛna ye kɔndi hinda hu, i ngaa nεε ye yɛ mbembei hu kɛɛ sayɛnsi ye tɛkulɔmii taa ye nafei.
- 2. Numu gbi lɔnya mia kɔɔ mahugbee kpɔtu kpɔtu i yε ngi gbatε hani ma, i yε a ngole ɔɔ hani lalangɔ ɔɔ sayɛnsi haaka.
- 28. Ngayilii Ye Nugboyono Mahuwayakpei

Numu gbi lɔnya mia kɔɔ ngi yee jawa kεε ngitiwoma gee i yεna, na a tɔ kε dunya lahei jisia ta hitilɔnga.

- 29. Ngayilii Ye Nugboyongo Mahutaawui
- 1. Numu gbi lee, mia i heina, tao a lɛna gulɔma, mahouingɔ i na hinda hou a loko veinja.
- 2. Ji numu a yε ngi lɔnyei kεε ngi hugbεmboi ya yenge ma, na lee a wote a kpεεnguu a wee a saweilɔ naa a nuu wɛkeisia ti lɔnyei kεε ti hugbεmboi ma vale, kεε numu kpεlε ti maahinda va ngoyila lɔɔhu.
- 3. Numu ϵ ye tonyei jisia k ϵ hugb ϵ mboi jisia yayenge nahi kpuango pilei na ma, tao gboma ϵ pind ϵ kaa na wooma na ndolo kp ϵ l ϵ gom ϵ i ti ndani.
- 30. Ngayilii Ye Numugboyongo Mahupuui

Gbεwogbε gbi na kɔlei ii hu na nu mu a nde yε kɛnga ti puilɔ na kɔɔ i ndɔlɔ ɔɔ ngoyila hugbatɛ lɛɛnga ti lɔnyei kee ti hugbɛmboi mahugbua.